



# 11

Niining Leksyona Matun-an Mo Kini

Ang Pagkamatay ni Lazaro

Si Jesus mao ang Pagkabauhan ug ang  
Kinabuhi

Si Jesus Mihilak

Ang Pagkabanhaw ni Lazaro

Ang Panagsabot Batok kang Jesus

## ANG PAGKAMATAY NI LAZARO

(Basaha ang Juan 11:1-16)



Nakat-onan nato nga si Jesus adunay gahum ibabaw sa balatian. Karon atong mahibaloan nga siya adunay gahum ibabaw sa kamatayon. Karong panahona atong nahibaloan nga ang mga mananambal gibansay aron pagtabang sa mga nagbalatian pinaagi sa paghatag kanila ug mga tambal. Apan wala gayuy nakakat-on unsaon pagbuhi sa tawong patay na. Apan si Jesus aduna niining maong gahum sa Iyang kaugalingon tungod kay Siya Dios man nga maghatag sa kinabuhi.

Si Maria, Marta ug Lazaro nagapuyo sa Betania mga 2 kilometro gikan sa Jerusalem. Sa dihang nasakit si Lazaro, ang iyang mga igsoon nga babaye nagpadala ug mensahi ngadto kang Jesus. Wala dayon moadto si Jesus sa pinuy-anan ni Lazaro sa Iyang pagkabati sa maong balita. Kini wala magapasabot nga wala Siya mahigugma ni Lazaro. Kondili tungod kay nasayud Siya kon unsay angay Niyang pagabuhaton. Nasayran Niya nga ang pagbanhaw ni Lazaro magahimo sa mga katawhan sa pagdayeg

sa Dios labaw kay sa igo lamang mamaayo si Lazaro gikan sa balatian,

Sa dihang miingon si Jesus nga moadto Siya sa Betania, ang Iyang mga tinun-an misulay sa pagpahunong Kaniya. Namiligro ang kinabuhi ni Jesus sa daghang mga panahon didto sa Jerusalem, ug ang mga tinun-an nangahadlok nga patyon si Jesus.

Misulti pag-usab si Jesus nga Siya mao ang kahayag sa kalibutan ug sila nga nagasunod Kaniya dili mapandol diha sa kangitngit.

#### Buhata Kini

1. Sa dihang gipatawag si Jesus sa mga igsoong babaye ni Lazaro, nganong wala man dayon moadto si Jesus aron pag-ayo sa Iyang higala?
  - . . . a) Daghan kaayog gibuhat si Jesus ug dili makatagad sa usa ka masakiton.
  - . . . b) Nahadlok si Jesus nga moadto sa Jerusalem tungod kay mamiligro ang Iyang kinabuhi.
  - . . . c) Nasayud si Jesus nga si Lazaro mamatay, apan kini usa ka higayon sa pagpakita sa gahum sa Dios.
2. Nakahinuklog na ba ikaw nganong wala dayon matubag ang imong mga pag-ampo?
 

Dili ba daw si Jesus wala lang magtagad?

## SI JESUS MAO ANG PAGKABANHAW UG ANG KINABUHI



(Basaha ang Juan 11:17-27)

Sa pag-abut ni Jesus didto sa Betania, si Lazaro patay na ug gilubong na mga tulo na ka adlaw. Midagan si Marta aron pagsugat kang Jesus. Ug miingon pa gayud siya nga nasayud siya nga ang Dios mohatag kang Jesus bisan unsay Iyang pangayoon.

Atong makaplagan kon giunsa ni Jesus paggiya ang babaye ngadto sa dakung pagsalig Kaniya. Una gisultihan ni Jesus si Marta nga mabanhaw ra ang iyang igsoon. Ug nasayud si Marta niini, apan ang iyang gitooan nga pagkabanhaw mao ang umalabot nga pagkabanhaw sa tanang mga minatay sa panahon sa paghukom.

**Juan 11:25.** ‘Ako mao ang pagkabanhaw ug ang kinabuhi. Ang mosalig kanako, bisan siya mamatay, mabuhi siya.’

Kadtong mga magatoo kang Jesus dili gayud mamatay sa espirituhanong bahin. Ug kon bisan pag mamatay ang ilang mga lawas, mabuhi ra sila pag-usab sa pag-abot sa panahon nga sila banhawon na.

Miingon si Marta nga mitoo siya nga si Jesus mao ang Anak sa Dios. Unya si Jesus miuban kang Marta ug sa ubang mga katawhan ngadto sa lubnganan ni Lazaro. Niadtong mga panahona ang mga patay gilubong diha sa mga lungib o sa mga buho nga anaa sa likod sa mga batoon nga pangpang o mga bukid. Ang patayng lawas gibutang sa sulod ug ang pultahan sa lungib tabunan sa dakong bato.

#### Buhata Kini

3. Unsa may gisulti ni Jesus ngadto kang Marta?

- a) Nga Siya mao ang pagkabanhaw ug ang kinabuhi.
- b) Nga si Lazaro mabanhaw ra sa katapusang mga adlaw.
- c) Nga dili tinuod nga duna pay pagbanhaw sa mga patay.

4. Pila na ka adlaw nga si Lazaro gilubong?

-----

5. Sag-uloha ang Juan 11:25.

6. Basaha ang bersikulo 27 ug sulati ang mga blangko.

“OO ..... ako nagatoo nga ikaw mao ang ....., ang ..... sa ....., ang moanhi sa kalibutan.”

**SI JESUS MIHILAK**  
(Basaha ang Juan 11:28-37)

Si Jesus usa gayud ka matuod nga higala nga nagatagad kanato kon aduna kitay mga suliran ug mga kaguol Mihilak Siya uban kang Marta ug mga higala apan sa taud-taud niini ang ilang paghilak napulihan ug kalipay. Makadala kita sa atong mga kaguol ngadto Kaniya ug makakaplag kitag kalipay.

Magatagad ba Siya kanako  
Kon adunay kasakitan  
Sa kagubot ko ug kagul-anan  
Ug may kalaay sa dalan

Magatagad ba Siya kanako,  
Kon kalibutan biyaan?  
Hapit mabungkag kasingkasing ko,  
Iya ba kahang makita

Oo, Siya makatagad  
Sa akong kagul-anan  
Kon panao malaay, gabii mamingao  
Siya magabantay

Frank E. Graeff

**Buhata Kini**

7. Pag-ampo alang ni bisan kinsa nga imong nahibaloan nga nagkinahanglan sa kalipay ni Jesus alang sa iyang mga kasakit.

## ANG PAGKABANHAW NI LAZARO (Basaha ang Juan 11:38-44)

Unsa kahay buhaton ni Jesus? Silang tanan nga nanagtindog diha sa duol nanaghunahuna gayud kon unsay pagabuhaton ni Jesus. Una sa tanan nag-ampo si Jesus nga nagpasalamat sa Dios tungod sa Iyang pagtubag Kaniya! Ug si Jesus misinggit sa makusog nga tingog nga nagingon **Lazaro** gula ngari. Ang patay naka-dungog sa tingog ni Jesus ug mibalik gikan sa kamatayon ngadto sa kinabuhi.

Mao kini ang hulagway sa panahon nga motawag na unya si Jesus sa tanang mga nangamatay sa paggula gikan sa ilang mga lubnganan. Ang pagkabhaw dunay duha ka bahin. Kad-tong nangaluwas mo-una pagbangon. Tapus sa dugayng panahon ang mga dili luwas mobangon usab ug pagahukman tungod sa ilang mga sala.

**Juan 5:28, 29.** Ayaw kamo kahibulong niini, kay ang takna nagasingabut na nga ang tanan nga anaa sa mga lubong managpakabati sa iyang tingog, ug ang mga nanagbuhat ug maayo managpanggula nga binanhaw ngadto sa kinabuhi, ug ang mga nanagbuhat ug mangil-ad managpanggula nga binanhaw ngadto sa pagkahinukman sa silot.

**1 Corinto 15:22, 23.** Kay maingon nga diha kang Adan ang tanan nangamatay, maingon man usab diha kang Cristo ang tanan mangabuhi. Apan ang matag-usa sa iyang kaugali-

ngong panahon; si Cristo, ang nahauna, ug unay sa iyang pag-anhi, sila nga mga iya ni Cristo.

Pinadayag 20:5. Ug bahin sa uban pa sa mga nangamatay, kini sila dili pa mabuhi pag-usab hangtud matapus una ang usa ka libo ka tuig.

#### Buhata Kini

8. Unsa may gibuhat ni Jesus kang Lazaro?
- . . . a) Mihilak si Jesus sa kamatayon ni Lazaro ug mao ray Iyang nabuhat.
  - . . . b) Gitawag Niya si Lazaro nga mogawas sa iyang lubnganan ug nabuhi Siya.
  - . . . c) Gilipay Niya si Maria ug Marta Pinaagi sa pagsulti nga mabanhaw ra si Lazaro sa umalabot.
9. Tanan bang tawo nga nangamatay mabanhaw gikan sa mga patay?
- . . . a) Dili ang tanang tawo mabanhaw kondili kadto lamang mga maayong tawo.
  - . . . b) Dili ang tanang tawo mabanhaw kondili kadto lamang mga dautang tawo nga moadto sa inferno.
  - . . . c) Oo ang tanang tawo mabanhaw ang maayo mabanhaw ngadto sa laing kinabuhi ug ang dautan kukman sa silot.



## ANG PANAGSABOT BATOK KANG JESUS (Basaha ang Juan 11:45-57)

Ang milagro mahitungod sa pagkabanhaw ni Lazaro gitaho ngadto sa mga kadagkuan sa tinoo-han. Ang ubang mga pangulo wala motoo nga aduna pay pagkabanhaw. Ang tanang mga kadagkuan nangahadlok nga basin masuko kanila ang kagamhanan sa Roma ug tungod niini nagsabut sila nga patyon si Jesus. Si Caifas ang labawng sacerdote miingon nga maayo pa nga dunay usa pagapatyon kay sa ang tibook nasud pagagun-obon.

### Buhata Kini

10. Unsa may nahunahunaan sa mga kadagkuan mahitungod sa pagkabanhaw ni Lazaro?

- . . . a) Nanagdayeg sila sa Dios?
- . . . b) Nagkasabut sila nga kinahanglan patyon si Jesus.
- . . . c) Wala sila motoo nga namatay si Lazaro.

11. Itandi ang imong mga tubag sa hustong mga tubag nga anaa sa katapusan niining leksyona.

12. Sulati ang imong rekord sa estudyante alang sa ika-11 nga leksyon.

## Mga tubag sa Ika11 nga Leksyon

Kon aduna kay 6 o 7 ka mga hustong tubag, markahi ug labing maayo, kon 5, markahi ug maayo, kon 4, kasarangan. Kon kubos sa 4 ang imong hustong tubag, basaha pag-usab kining leksyona.

1. o) Nasayud si Jesus nga si Lazaro mamatay apan nga kini usa ka higayon sa pagpakita sa gahum sa Dios.
3. a) Nga Siya mao ang pagkabanhaw ug kinabuhi.
4. Upat ka adlaw.
6. Ginoo, Cristo, Anak, Dios.
8. b) Gitawag Niya si Lazaro nga mogawas gikan sa iyang lubnganan ug nabuhi siya.
9. c) Oo ang tanang two mabanhaw ang maayo mabanhaw ngadto sa laing kinabuhi ug ang dautan hukman sa silot.
10. b) Nagkasabut sila nga kinahanglan patyon si Jesus

Gidaghanon sa hustong mga tubag \_\_\_\_\_

Grado \_\_\_\_\_